

Nanaalua ina xan Inaatel Pol laa sin no Korin

¹ Iaa, Pol, Moroaa tii ilei taman xan sirsiir ngali tsap xan aposal Iesu Karisito, ma Timoti xida taamat.

Gelulu ataala abala inesaait laa sin xan mate-naanua Moroaa tia Korin, ma laa sin no untal-taalnge lalon prowins Akaia.

² Amiimiilam ma malina laa sin gim xaal sin Moroaa xida Mom ma Orong Iesu Karisito.

Moroaa ina no axoxorong araraa

³ No paipa'ii a laa sin Moroaa iwaa xan Mom xida Orong Iesu Karisito, iwaa Mom ina biir-birum ma ia Moroaa ina axoxorong.

⁴ Iwaa ta axorongi gita sin xida no xirabas araraa ngalibi gita ba pupua ngali axorongi abia di lalon no mat laxen xirabas taman abia axoxorong gita tii se adi xaal sin Moroaa.

⁵ Amuina malen mu xan sosong Karisito tii tamkabare papan nagelulu tino, biao bula lalon Karisito nagelulu axoxorong a asuk usli buxa.

⁶ Nawe gelulu se xaa taman lolbiir, biao ngali nagim axoxorong ma nagim atotoaa, o nawe Moroaa axorongi gelulu, biao ngali nagim axoxorong, biao ta atsapngen lalon gim, liliis adamis, tilwatwat ngali tsigaii biao sosong sin abia uk sal gelulu ta tsigaii.

⁷ Ma nagelulu tinaalnge ngali gim asuk watwat amuina gelulu atii we malen bula, gim ta exasen

abia nagelulu sosong, biaabi gim bula, gim ex-
asen abia nagelulu axoxorong.

⁸ Nugu no taamat, gelulu saan ngali gim na
leng sin sen sosong gelulu ta se xaao taman lalon
Prowins Asia: gelulu tii xap pupua ngali atsaxei
abia no xaraxin mamaet ta bibingi gelulu, a suk
liwaa nagelulu watwat ma gelulu ga adodo we
gelulu ba soro met.

⁹ Asuk so lalon nagelulu no butsa gelulu suk
saaen abia ininte ina minet. Oro balawaa atsap
ngali gelulu na xap taalnge sin gelulu tsaa, oro sin
Moroaa iwaa ta atapaasi no minet.

¹⁰ Moroaa a se aleiwaai gelulu sin no mat laxen
minet ma naba aleiwaai gelulu sin no xirabas.
Lalon ia, gelulu axosngi nagelulu tinaalnge biao
naba ta tigiri aleiwaai gelulu,

¹¹ malen gim ta tiltsoxomi gelulu taman nagim
no sausawit. Xuduxudu ina no inaman di ba put-
sangi axaau laa sin Moroaa ngali gelulu sin abia
xan axoxorong ina amiimiilam tii tali sin gelulu
ngali xixiis ina xadi no sausawit no inaman.

Pol a putsi xan no adodo

¹² Talaawaa balawaa nagelulu parparaak: biao
nagelulu no adodo lalon nagelulu no butsa ta
paare leng taman gelulu tsaa we, biao no mat
namaang gelulu tii amusili lalon abala xolkol-
moxo ina inaman ma biao nagelulu xalkale so
etudim mii gim lalon abia ta pat ma mixat ta
xaal sin Moroaa. Gelulu xap xosaraa abala lalon
sinaae ina xolkolmoxo ina inaman oro amusili
xan amiimiilam Moroaa.

¹³ Amuina gelulu xap atalaa xawas biaa gim ta xap pupua ngali xoxoti o leng sin. Ma iaa taalnge we,

¹⁴ malen gim se leng sin biexaa maarang, gim ba xaalame ngali atik araraai we gim ba pupua ngali paraak taman gelulu malen mu gelulu ba ta paraak taman gim sin xan leng Orong Iesu.

¹⁵ Amuina ngali nugu xaraxin adodo ngali abala. Iaa adodo ngali laa uwaa gim setauan ngalibi gim ba pupua ngali adi nanaalua ina tubudaan.

¹⁶ Iaa adodo ngali uwaa gim sin nugu ines laa Masedonia ma ngali mula xaalame sangan gim xaal Masedonia ma gim ba tulen iaa laa sin nugu ines laa Judaia.

¹⁷ Biaa iaa ta adodo puua abala, iaa adodo we, iaa tii xap xosor gomsai. O gim sen adodo we, gim we nugu puapua amusili namaang ina xolkolmoxo ngalibi sin abia uk ngus iaa ba paare we, "Iou, iou" ma "A xap, a xap?"

¹⁸ Oro malen aso, Moroaa asuk so, nagelulu inesaait laa sin gim, a xap "Iou" ma "A xap."

¹⁹ Ngali iwaa xan tsi Moroaa, Iesu Karisito, iwaa iaa ma Sailas ma Timoti getu ta babaais labatina gim taman, a xap we "Iou" ma "A xap," oro lalon ia nagetu no totore a tigiri we, "Iou."

²⁰ Amuina a xap xawas sin aisa no xuxubu Moroaa tii se xubatsi, biaa no se araraa, no iou lalon Karisito. Biaabi lalon ia, getu paare, "Aso" laa sin xan minaalam Moroaa.

²¹ Talaawaa, Moroaa mu a xosaraa gita araraa ngali tilwatwat lalon Karisito. Ma ga axilangi apati gita,

²² ga baraa gita ngali xan no tsaa ma ga tali Nantanuan lalon xida no butsa malen xa xuxubu ngali asoi we naba tali abia no maarang axaau sin gita talaa mil.

²³ Iaa ningi Morooa ngali awatwati nugu pa-paare ma balawaa se: iaa tii xap mula laa Korin amuina iaa tii xap saan ngali tali sosong sin gim.

²⁴ Getu xap saan ngali aorongi getatuul tsaa papan nagim no tinaalnge, oro getu taxaa mii gim ngali nagim tataton, amuina sin tinaalnge mu gim ba tilwatwat.

2

¹ Biaabi iaa ga adodo ngali ina xap xosaraa xa limlim bula ngali asosongi gim.

² Amuina nawe iaa alolbiri gim, saa bula ia ngali atatoni iaa oro gim mu iaa ta se alolbiri gim.

³ Iaa atal wenangen atia ngalibi biaa iaa tii xaalame iaa ba xap lolbiir sin abia di, di tii pupua ngali atatoni iaa. Iaa tii suk taalnge sin gim se araraa ngali gim ba exasen nugu tataton mii iaa.

⁴ Amuina iaa atatal laa sin gim taman lolbiir lalon nugu butsa taman no daan didinmat, a xap ngali alolbiri gim, oro ngali gim ba atii riri so ina nugu titii ngali gim.

Adodolii no untsaxa

⁵ Nawe xa tii se alolbiri xaa inaman, a se alolbiri iaa malen tii alolbiri gim araraa lalon biexaa sal, oro iaa xap saan ngali paare burusaak.

⁶ Biaa sosong biaa xuduxudu ina gim ta tali sin ia, a pupua mu ngali ia.

⁷ Oro talaawaa gim na adodolii xan no namaang ma gim na axorongi ia, ngalibi gim ba xap alolbiri buxaai ia.

⁸ Iaa suk anaai buxaai gim ngali asen mulangenai nagim titii ngali ia.

⁹ Muina iaa tii atatal laa sin gim ngali lasi nawe gim tilwatwat sin abia xonkonon ma gim tii ga lolong amusili no maarang araraa.

¹⁰ Nawe gim adodolii xan no namaang tsaxa xa, iaa bula iaa ba adodolii xan no namaang tsaxa. Ma sawe iaa tii se adodolii, nawe xawas ia ngali adodolii, iaa se adodolii nan no matan Karisito ngali nagim axaau.

¹¹ Ngalibi Saatan naba xap paapok liwaa gita. Amuina gita atii xan no ngitngit.

No untutule ina xuxubu uul

¹² Talaawaa biao iaa ta laa Troaas ngali baais taman xan inesaait mamainaang Karisito ma iaa ga tatanginai we Orong a se tsalali mat ngali iaa.

¹³ A xap xa malina lalon nugu adodo, amuina iaa xap tatanginai nugu taamat Taitus tia. Biaabi iaa tii ga we xubalaasaai sin di ma iaa tii ga laa Masedonia.

¹⁴ Oro iaa putsangi axaau sin Moroaa, iwaa ta tigiri laamuangen gita ngali til nan xan minaalam ina buro lalon Karisito ma Moroaa ga xaaparen abia tsino mamainaang ina biao sinaae ina ia sin gita, sin no xolot araraa.

¹⁵ Amuina sin Moroaa, gita xan no tsino marir Karisito labatina abia di, di tii se tuo ma biao di tii se laa ngali met.

¹⁶ Sin aia xa gita abia tsino ina minet; sin iexa gita no tsino ina tino ma a xap xa naba pupua ngali xosaraa abia tinaxaa.

¹⁷ Gita xap malen biexaal gita ta xap baais taman xan totore Moroaa ngali xosor xuxute; oro asuk xaatsap lalon Karisito gita paare laamuaan Moroaa taman so, malen no inaman Moroaa ta tulen di.

3

¹ Iaa Pol ma Timoti, gelulu xap saan ngali paraak taman gelulu tsaa. Ma gelulu xap saan ngali xaa inaatel na laa sin gim o xaal sin gim malen biexaa inaman, di ta saan ngali xaal di na atatal taman di tii sen axaau we.

² Gim tsaa, gim nagelulu inaatel, biao di tii atalaa nan nagelulu no butsa, biao no inaman araraa di tii atii ma di tii xoxoti.

³ Gim asen weaatalaa gim biao inaatel xaal sin Karisito biao no waawaan ina nagelulu inatalil, di xap atalaa taman xinaal oro di tii atalaa taman Nantanua ina iwaa Moroaa ta tino, di tii xap atalaa papan xaat oro di atalaa lalon xan butsa taamat.

⁴ Gelulu paare weatia amuina lalon Karisito ma lalon no matan Moroaa, gelulu leng we balawaa no maarang aso.

⁵ Gelulu tsaa gelulu xap pupua ngali xosaraa abala tinaxaa oro Moroaa mu iwaa ta tali abia tinaxaa sin gelulu ngali gelulu ba pupua ngali xosaraa abala tinaxaa.

⁶ A se xosaraa gelulu malen no untutule ina abia xuxubu uul ma ga tali abia xoror sin gelulu ngali abia tinaxaa. Biao xuxubu uul di xap

xosaraa taman no mat laxen lo biaa di tii atalaa, a xap. Oro axaal sin Nantanua Pat, amuina biaa no lo di tii atalaa asas amantei no inaman, oro Nantanua Pat a tali tino.

Xan minaalam abia xuxubu uul

⁷ Talaawaa biaa no lo biaa Morooa tii se tali sin Moses, Morooa tii atatal papan no xoltin xaat ta lua ma tii ga tsap taman xan minaalam Morooa. Biaa Moses tii tali abia no xoltin xaat ta lua laa sin no inaman Israel, no inaman Israel di tii xap pupua ngali atsoxaa no matan Moses amuina no matan a tsila taman xan minaalam Morooa, oro mil sin biaa laleng ta atiltsoli ngali maraamen. Nawe no lo atigiri tali minet, a xaalame taman minaalam,

⁸ mil biaa xuxubu uul ina Nantanua Pat naba ie minaalam buxa.

⁹ Biaa xan lo Moses a xaalame taman minaalam, oro tinaxaa ina amumusili lo a tali mu minet. Oro tinaxaa ina abia xuxubu uul a xosaraa atutiki no inaman lalon no matan Morooa ma minaalam ina abia xuxubu uul biaa ta suk lot buxa.

¹⁰ Amuina sawe tii ie minaalam, tii xap xaka minaalam talaawaa, puua mii abia minaalam ta suk lot buxa.

¹¹ Ma nawe xan lo Moses a se maraamen laalaa, tii xaalame taman minaalam, biaa ta suk so we biaa xuxubu uul naba man laaliu, ma xan minaalam abia xuxubu uul naba suk lot buxa.

¹² Biaabi, gelulu xap mataa ngali baais taman abia inesaa it mamainaang, amuina gelulu ta liliis taman tinaalnge ngali abia xuxubu uul biaa ta man laaliu.

¹³ Gelulu xap malen Moses, iwaa tii baaii no matan taman pu uga ngali tilkaali no inaman Israel ngali di ba xap matngen abia laleng tii se atiltsoli ngali maraamen.

¹⁴ Oro xadi no adodo asuk lodo, amuina sin abala leng, biao uk pu uga tsaa biao ta manman, biao di ta xoxoti abia xuxubu xabaar. Di xap mager saali abia pu uga, amuina lalon Karisito mu, Orong naba saali.

¹⁵ Talaawaa tsaa sin abala leng, biao di ta xoxoti xan lo Moses, biao pu uga tsaa a baaii xadi no butsa.

¹⁶ Oro nawe xa a puxutsi laa sin Orong, naba saali abia pu uga.

¹⁷ Iwaa Orong, ia Nantanua Pat, ma iwaa xa Nantanuan Orong ta manman lalon ia, naba suk man leiwaa so.

¹⁸ Orong tii se saali abia pu uga sin no matan gita araraa, gita tii se atsilaa xan minaalam Orong. A soxisi gita ngali tsap malen ia taman abia minaalam ta lo tsiktsik buxa, biao ta xaal sin Orong iwaa Nantanua.

4

Tang lalon sobuk ina pula madaas

¹ Biaabi, iaa, Pol ma Timoti, gelulu ba xap lolbiir ngali xosaraa balawaa inatalil, amuina sin xan biirbirum Moroaa, a tali abala inatalil sin gelulu.*

² Gelulu se palolii biao no namaang araraa ta xuxii ma ina minangel. Gelulu xap xosaraa xaa daraxe ngali puxutsi xan Totore Moroaa. A

* **4:1 4:1** Pol ma Timoti.

xap, gelulu asen namaang so. Ma sin abala namaang gelulu asen gelulu tsaa sin xadi adodo no inaman ngali di ba nanxilalaa gelulu malen gelulu axaau. Ma gelulu ga xosaraa abala lalon no matan Morooa.

³ Biexaa inaman di xap leng sin abala inesaait mamainaang, amuina di tii se amusili sal laa sin minet.

⁴ Iwaa morooa ababaa ina abala nan ul, a se alodoi xadi no adodo no muun taltaalnge, ngalibi di ba xap lasi xalaleng ina inesaait mamainaang ina xan minaalam Karisito iwaa nan patpatsen Morooa.

⁵ Amuina gelulu xap baais taman gelulu tsaa oro gelulu baais taman Iesu Karisito malen Orong ma gelulu tsaa malen nagim no untutule ngali Iesu.

⁶ Amuina iwaa Morooa tii paare, *“Xalaleng na tsila tsuul xaal nan lodo,”*✠ a xosaraa xan laleng ngali tsila lalon xida no butsa ngali tali laleng ina sinaae ina xan minaalam Morooa sin gita lalon no matan Iesu Karisito.

⁷ Oro gelulu ie tang, biao inesaait mamainaang, lalon sobuk pula madaas ngali asen we balawaa no xaraxin watwat araraa axaal sin Morooa ma a xap xaal sin gelulu.

⁸ No mat laxen mamaet tii xaalame ngali epuske mii gelulu sin no xolot araraa oro di xap axaxaitsaa gelulu. Gelulu adodo xuduxudu oro gelulu tii xap lolbiir buxa.

⁹ Di tii xosor atsaxati gelulu oro Morooa tii xap papaalii gelulu; di tii panlii gelulu lapula oro di tii xap tsaalen gelulu.

✠ 4:6 4:6 Til 1:3

¹⁰ Gelulu tigiri alet sosong lalon nagelulu no pakpak, ngali gelulu ga asen alengi xan minet Iesu ngalibi di ba lasi xan tino Iesu bula lalon no isuaan gelulu.

¹¹ Amuina gita no saa gita ta tino, gita tigiri tali gita tsaa laa sin minet ngali xan axaau Iesu, ngalibi xan tino naba asemat sin no isuaan gita ina minet.

¹² Biaabi minet ga taktaxaa lalon gelulu, oro biao tino a taktaxaa lalon gim.

¹³ Di atalaa we: *“Iaa taltaalnge; biaabi iaa tii ga papaare.”*☆ Taman abia uk tanua ina tinaalnge gelulu taltaalnge bula ma biaabi gelulu ga papaare.

¹⁴ Amuina gelulu tii atii we iwaa xa tii atapaasi Orong Iesu sin minet naba atapaasi bula gelulu mii Iesu ma naba atilngi gelulu mii gim nan no matan.

¹⁵ Balawaa no araraa ngali nagim axaau, ngalibi biao amiimiilam biao tii tsiili xuduxudu ina inaman ma ga pupua ngali atsapngen biao puputsa axaau ngali naba usli buxa laa sin xan minaalam Morooa.

¹⁶ Biaabi gelulu na xap lolbiir buxa. Nawe nagelulu no pakpak a maraap, Morooa naba auuli mulangen nantanuan gelulu sin no leng xuxuuk.

¹⁷ Amuina nagelulu no pu xirabas dokdok, a tigiri atsapngen abia minaalam laaliu sin gelulu, biao ta suk axaau buxa ngen di araraa.

¹⁸ Biaabi gelulu na xap atsoktsokmat sin senaara gelulu ta lasi oro sin senaara gelulu ta

☆ 4:13 4:13 Saam 116:10

xap lasi, amuina sawe gelulu ta lasi naba xap man adis, oro sawe gelulu ta xap lasi naba man laaliu.

5

Xida xalkale balalangit

¹ Talaawaa gita atii biala xida pakpak a malen anuasel gita ta manman lalon balan pula. Nawe di tsaalen xida anuasel, gita ie biexa anua biala ta xaal sin Morooa naba man laaliu balalangit, biala no inaman di ta xap xosaraa taman no liman di.

² Talaawaa tsaa xida no butsa di teng lolbiir amuina gita saan buxa ngali ugauga taman abia pakpak uul in balalangit.

³ Amuina biala gita ta ugauga taman abia no pakpak in balalangit, di ba xap tatanginai we, gita belbel.

⁴ Sinsa biala gita ta manman tsaa nan abia pakpak, gita teng ma lolbiir ma gita ie mamaet, amuina gita palo ngali met ma gita nii xap ie pakpak, oro Morooa naba tali sin gita no pakpak uul in balalangit, ngalibi xida no pakpak biala ta se laa ngali met naba putsi ma naba tino.

⁵ Talaawaa, Morooa tsaa aia ta xosaraa gita ma xida no pakpak ngali tino uul, ma tii ga se tali nantanua sin gita malen xan xuxubu ngen mil ngali semaarang naba ta xaalame.

⁶ Biaabi gita tii ga tigiri atii so we, biala gita ta tino tsaa lalon pakpak malen xida anua, gita man palaaen tsaa Orong.

⁷ Gita eses taman tinaalnge ma a xap sin nanen ina namaang ina balan pula.

⁸ Gita suk atii so, ma iaa sebula paare, gita saan ngali tsuul alen abala pakpak ma gita na man mii Orong.

⁹ Biaabi gita na atsapngen xida sasaae watwat ngali atatoni Orong nawe xida tino lalon pakpak o lalon tino in balalangit.

¹⁰ Amuina gita araraa, gita ba aseat laa-muaan xan xalkale ina ininte Karisito, ngalibi gita xuxuuk gita ba tsiili sen iliil ngali senaara gita ta xosaraa ta axaau o ta tsaxa.

Inatalil ina malum

¹¹ Biaabi, amuina gita atii ngali mataatinai Orong, gita ga xonon ngali asaait awatwati no inaman ngali taltaalnge sin Iesu. Morooa asuk atik axaautsi gita no sen mat laxen inaman ma iaa taalnge we, aleng bula sin nagim no adodo lalon nagim no butsa.

¹² Gelulu xap saan ngali pinis atilngi gelulu tsaa sebula laa sin gim, oro gelulu tali abia xolot ngali gim na paraak taman gelulu ngali gim ba pupua ngali xisi abia di, di ta paraak taman maarang di tii lasi ma a xap no maarang lalon xadi no butsa.

¹³ Nawe no inaman di adodo we gelulu ngong sin nagelulu no adodo, balawaa ngali xan tinaxaa Morooa; o nawe nagelulu adodo a tutiik, biao ngali nagim axaau.

¹⁴ Sinsa xan titii Karisito a atuaai gelulu ngali taxaa ngali ia, amuina gelulu suk atik axaautsi weaatalaa, taamat axuuk a met ngali inaman araraa, biaabi gelulu se met bula mii ia.

¹⁵ Ma ga met ngali gita araraa, ngalibi biaa di ta tino di ba xap tino ngali di tsaa, oro di na tino ngali iwaa ta met ngali di ma ga tapaas mula.

¹⁶ Ti laamua gelulu tii lasi inaman malen no inaman ina xolkolmoxo di ta lasi di. Oro xaal atalaa ma laa gelulu ba xap xilalaa xa taamat taman namaang ina abala balan pula. Sinsa gelulu tii nen wenangen Karisito sin abala sal, oro gelulu ba xap xosaraa bula abia.

¹⁷ Biaabi nawe saa ia ta man nan Karisito, a se tsap axoxos uul, biaa tino xabaar tii se xap ma biaa axoxos uul a se tsap.

¹⁸ Balawaa no araraa axaal sin Morooa, iwaa tii tali ukbal sin gita ma ia tsaa lalon Karisito, ma tii ga tali abia inatalil ina malum sin gelulu.

¹⁹ Sinsa Morooa a se ukbal sin abala xolkolmoxo mii ia tsaa lalon Karisito, ma tii ga xap iesei xadi no namaang tsaxa no inaman tii epuske mii di. Ma tii ga se tali sin gelulu inesaait ina malum sin no inaman.

²⁰ Morooa tii tulen gelulu ngali baais ngali Karisito, malen gelulu xan no ngutsu, biaabi tii ga ningi awatwati no inaman ngali tsiili abia xan inesaait, tii ga tulen gelulu ngali baais taman ia. Gelulu ningi awatwati gim sin iesan Karisito ngali gim ba ukbal mii Morooa.

²¹ Karisito tii xap xosaraa xaa namaang tsaxa, oro Morooa aturungi xida no namaang tsaxa papan ia, ngalibi lalon ia mu gita ba tsap no untutiik mii Morooa.

6

¹ Gelu xan no untinaxaa Morooa ma gelulu ga atsuraa awawati gim ngali gim na xap lii gomsaai

xan amiimiilam Moroaa sin ta xap nagim xaa waawaan.

² Amuina Aisaia a paare,
“Sin leng ina nugu sirsiir mamainaang iaa tii
longmien gim,
ma sin leng ina atotoaa xa iaa tiltsoxomi
gim.”☆

Iaa asaaiti gim, talaawaa xan leng Moroaa ina
xan sirsiir mamainaang ma talaawaa xan leng
ina atotoaa xa.

Xan xaraxin mamaet Pol

³ Gelulu xap aturungi xawas lalon xadi sal no
inaman ngali di na litke, ngalibi di ba xap paare
tsaxa ngali nagelulu inatalil.

⁴ Oro, malen xan no untutule Moroaa, gelulu
asen gelulu tsaa sin xadi adodo no inaman ngali
di ba nan xilalaa gelulu malen gelulu axaau lalon
abala inatalil, malen gelulu ta tilwatwat lalon no
mat laxen mamaet, no xirabas ma sosong.

⁵ Di tsaapi gelulu ma di lii gelulu nan anuen
lodo. Gelulu man lalon no xaraxin inesas.
Nagiem tinaxaa awatwat, gelulu ga xap urange
axaau ma gelulu ga adi xaraxin itol.

⁶ Gelulu taliil lalon namaang ta mixat, taman
sinaae ta leng, taman liliis Adamis ma namaang
mamainaang lalon Nantanua Pat ma lalon titii so.

⁷ Gelulu baais taman soina totore ma lalon xan
xoror Moroaa; mii no urur ina tutiik lalon lima
mua ma lima xaiaar.

⁸ Gelulu lo taltaliil lalon abia inatalil biao no
inaman di ta manglen gelulu ma biao di ta xap
manglen gelulu, biao no inaman di ta paare tsaxa

☆ 6:2 6:2 Ais 49:8

ngali gelulu ma biala di ta pa'ii gelulu. Gelulu lo taltaliil malen no untinaxaa so, oro di lasi gelulu malen no unaababaa.

⁹ Di atii gelulu, oro di lasi gelulu malen di xap atii gelulu; gelulu we na se met oro gelulu tino tsaa; di tsaapi gelulu oro di xap sas amantei gelulu.

¹⁰ Gelulu suk matabirum tsaxa oro gelulu tigiri taton; gelulu no muun was oro gelulu xosaraa xuduxudu ina di, di ga tsap no untang; gelulu xap ie was oro gelulu tapkina no maarang araraa.

¹¹ Gim no Korin, gelulu se paare alenglengi no maarang so sin gim, ma gelulu ga tsalali nagelulu no butsa laa sin gim.

¹² Gelulu xap taxaariti mulangen nagelulu titii sin gim, oro gim taxaariti mulangen nagim titii sin gelulu.

¹³ Iaa papaare laa sin gim malen nugu no tsixi, malen gelulu ta xosaraa sin gim, gim na tsalel buxaai nagim no butsa bula sin gelulu.

Gim na xap etaxaa mii no muun taltaalnge

¹⁴ Gim nangaam etaxaa mii no muun taltaalnge. Amuina namaang tutiik ma namaang tsaxa delulu xap etuna ma xalaleng a xap etaxaa mii lodo.

¹⁵ Sen malum biala labatina Karisito ma Saatan? Iwaa untaltaalnge asen etuna we mii xa muun taltaalnge?

¹⁶ Sen mat ukbal biala labatina Xan Anua Morooa ma no malagan? Amuina gita tsaa gita Xan Anua Morooa ta tino. Malen Morooa ta se paare, "Taa ba tino mii di
ma iaa ba eses labatina di,

ma iaa ba tsap xadi Morooa,
ma di ba tsap nugu inaman.”☆

17 “Orong a paare, ‘Biaabi, gim na tsuul poroklii
di

ma gim na xap man etudim mii di,
Gim nangaam biltan xa maarang na morokon,
ngali iaa ba suei atatoni gim.”☆

18 “Orong iwaa Belaba a paare.☆ ‘Iaa ba tsap
nagim Mom,
ma gim ba tsap nugu no tsi ma tsaxana.”☆

7

1 Nugu no taamat, Morooa tii se tali abala no
xuxubu sin gita, biaabi gita na amixati gita tsaa
sin no maarang araraa biaa ta tsaalen no isuaan
gita ma nantanua ta taxaa watwat ngali tsap pat,
amuina sin gita ta manglen buxaai Morooa.

Xan tataton Pol

2 Gim na tali xa xolot tia nan nagim no butsa
ngali gelu, gelu xap amoki xa, gelu xap tsaalen
xa, gelu xap apanaai xa.

3 Iaa xap paare taman abala ngali atuti xa
mamaet sin gim, malen iaa ta setauan paare, gelu
aturungi gim lalon nagelu no butsa ngali gelulu
ba tino o met mii gim.

4 Iaa taltaalnge sin gim; iaa pa’ii gim. Nagim
tino anaai iaa, lalon nagelu no xirabas, nugu
taton a xap tatanginai xa xapkap ina.

5 Biaa gelulu tii tsap Masedonia, no isuaan
gelulu a xap iaawis, oro sin no daan xolot gelulu

☆ **6:16 6:16** Lew 26:12; Jer 32:38; Ese 37:27 ☆ **6:17 6:17** Ais
52:11; Ese 20:34, 41 ☆ **6:18 6:18** 2Sa 7:8 ☆ **6:18 6:18** 2Sa 7:14

ta laa, no mamaet atsap, mamaet ulti gelulu, minataa bala lalon gelulu.

⁶ Oro Moroaa iwaa ta tali axoxorong sin no matabirum, a tali axoxorong sin gelulu sin xan tsinap Taitus,

⁷ ma a xap mu ngali xan tsinap Taitus oro ngali biao axoxorong gim tii tali sin. Asaaiti gelulu bula taman nagim adodo watwat ngali iaa ma nagim xaraxin lolbiir ngali iaa, ma nagim xaraxin saansaan ngali iaa, ngalibi nugu taton tii ga suk lot buxa.

⁸ Nawe nugu inaatel tii alolbiri gim, iaa suk xap lolbiir ngali abia inaatel oro iaa suk lolbiir ngali lasi malen nugu inaatel a tali sosong sin gim, oro ngali xolot dokdok mu ina leng.

⁹ Oro talaawaa tsaa iaa taton a xap amuina sin gelulu ta alolbiri gim, oro amuina biao nagim lolbiir a giwaa gim ngali puxisbal. Amuina biao lolbiir axaal sin Moroaa ma gelulu ga xap tali xaraxin lolbiir sin gim.

¹⁰ Biao lolbiir ta xaal sin Moroaa atsapngen puxisbal ngali laamuangen laa sin atotoaa xa ma a xap amangieli xa, oro biao lolbiir ina xolkolmoxo ina inaman a tali minet.

¹¹ Balawaa lolbiir ta xaal sin Moroaa tii atsapngen lalon gim: taton ngali xosaraa namaang tutiik isagaa ngali paare xali gim tsaa, gim magaa amuina sin no namaang tsaxa, gim olol sin no morokon biexaal di ta xosaraa, nagim xaraxin adodo ngali Moroaa, taxaaturung ngali lasi ininte mamainaang naba ta tsap. Sin abia no maarang araraa gim se asen gim tsaa we, gim mixat laamuaan Moroaa sin abala no maarang.

¹² Iaa atatal laa sin gim, a xap amuina sin aia taamat ta xosaraa namaang tsaxa, ma a xap ngali aia xa tii sas atsaxati, oro laamuaan Morooa gim pupua ngali atik axaautsi we gim tii amusili awatwati gelulu malen nagim no lalaamua.

¹³ Sin abala no maarang araraa gim tii anaai gelulu.

Papan abia gim tii anaai awatwati gelulu, gelulu tii suk taton ngali lasi Taitus ta taton, amuina asuk iaawis axaau ma ga xalkale axaau mii gim.

¹⁴ Iaa tii se paraak tsaa laa sin Taitus taman gim, ma gim tii ga xap amangieli iaa. Oro malen no maarang araraa gelulu ta paare taman no sin gim aso, nagelu parparaak taman gim laa sin Taitus aso bula.

¹⁵ Ma biao tii adodomi we, gim lolong amusili ia ma gim tii ga suei atatoni lalon namaang ina adokdoki gim ma taman xaraxin mangmangle xa ta titii buxaai gim.

¹⁶ Iaa taton we iaa suk taalnge so we gim ba xosaraa no maarang araraa ta tutiik.

8

Tinabel mamainaang

¹ Ma talaawaa, nagelu no taamat, gelu saan ngali gim na atii abia amiimiilam, biao Morooa tii tali sin xan no matenaanua Morooa Masedonia.

² Biao di ta man lalon no xaraxin xonkonon, xadi taton tii suk lot ma biao di tii suk muunwas buxa, di pupua tsaa ngali tabiel buxa.

³ Iaa we ina paare leng weaatala, di tii suk tabiel buxa taman no daan maarang di ta pupua

ngali tabiel taman, ma di ga tabiel buxa ngen sawe di ta pupua ngali tabiel taman. A xap xa na asaaiti di ngali tabiel weaatia.

⁴ Di ningning watwat mii gelulu ngali xa sal ngali exasen lalon abala tinaxaa laa sin xan no inaman tsaa Morooa.

⁵ Ma di ga xap xosaraa malen gelulu tii adodo ngali di na xosaraa, oro di tii tali di, setauan sin Orong o mil di tii ga tali sin gelulu, ngali amusili xan sirsiir Morooa.

⁶ Amuina Taitus a setauan laamuangen gim ngali atiltsoli abala tinaxaa ina amiimiilam, gelulu tii atsuraa awatwati ia ngali na laamuangen gim bula ngali axumuli araraai no tinabel.

⁷ Oro, malen mu gim ta minaas taman no daan maarang lalon: nagim tinaalnge, nagim babaais, nagim sinaae, nagim xaraxin taton ngali xosaraa sawe ta tutiik ma lalon nagim titii ngali gelulu. Ga axaaau ngali gim na minaas lalon abala amiimiilam bula ina tamtabiel.

⁸ Iaa tii xap asaaiti gim ngali gim na xosaraa abala oro iaa we ina xonon nagim riri ina titii mii xadi namaang no inaman in Masedonia, taman xadi tataton ina tamtabiel.

⁹ Amuina gim atii xan amiimiilam xida Orong Iesu Karisito. Tii untang, oro ngali gita ga tii tsap muunwas ngalibi sin xan muunwas gita ba tsap no untang.

¹⁰ Ma balawaa nugu inanaa, ngali semaarang ta axaaau sin gim ngali xosaraa: Sin abalaa miet tii se xap, gim tii nanaaxuuk ina xan no matenaanua Morooa, gim tii saan ngali tabali gelulu ma gim tii no nanaaxuuk bula gim tii atiltsoli ngali xosaraa no.

¹¹ Talaawaa gim na araraai abia tinaxaa gim ta suk watwat ngali xosaraa ngalibi biaa sirsiir ngali xosaraa naba etuna mii abia ngali araraai, tabiel amusili gim ta pupua ngali xosaraa.

¹² Amuina nawe biaa sirsiir ngali tabiel a man-man, biaa tinabel atatoni Morooa, amuina naba tabiel xaal sin xan no maarang ta auneunai.

¹³ Gelulu xap adodo we nagim tinabel naba malus ngali biexaal ma na lelep ngali gim tsaa. Gelulu adodo we gim na arie pupua mu.

¹⁴ Talaawaa, biaa nagim minaas naba tabali biaa di taman sawe di ta muun ngali, ngalibi biaa xadi minaas mil, di ba tabiel mulangen gim ta muun. Biaa ngali gim ba arie pupua.

¹⁵ Malen Moses ta atala: *"Twaa xa ta axumuli buxaai xan no daan maarang naba xap ie was buxa, ma iwaa xa ta axumuli xan no maarang ta xap buxa, naba xap muun."*✠

Pol a tulen Taitus laa Korin

¹⁶ Iaa putsangi axaau laa sin Morooa, iwaa ta aturungi biaa uk adodo sin xan butsa Taitus ma iaa ngali gim.

¹⁷ Taitus ataton mu sin nagelulu adodo, oro naba xaalame sangan gim taman xan xaraxin tataton tsaa ma xaraxin saansaan ngali lasi gim bula.

¹⁸ Ma gelu tulen ia mii iexa xida taamat bula, iwaa xan no matenaanua Morooa araraa di ta pa'ii ia, ngali xan tinaxaa ina inesaait mamainaang.

¹⁹ A xap abia mu, xan no matenaanua Morooa di tii axilangi ia, ngali na tiltsomi gelulu ngali

adi biao tinabel ngali exasen axaautsi, ngali manglen Orong tsaa, ngali asen nagelulu sirsiir ngali tiltsomi gim.

²⁰ Gelulu saan ngali tilbanti xaal taman xadi no totore xuduxudu ngali gelulu ta sen tilaamamil we sin abia xaraxin tinabel.

²¹ Amuina gelulu xosaraa no maarang araraa gelulu ta pupua ngali xosaraa ta tutiik, nan no matan Orong, ma nan no matan no inaman araraa bula.

²² Ma mii delulu, gelulu ba tulen iexa ina nagelulu xa taamat bula, iwaa ta se asen ia tsaa sin gelulu sin no daan sal, malen gelulu pupua ngali taalnge sin, ma talaawaa bula ngali xan xaraxin tinaalnge bula ngali gim.

²³ Ngali ilaa Taitus, ia nugu taamat ma nugu uk untinaxaa labatina gim: O ngali nagelulu no taamat, di til axilangi xan no matenaanua Morooa, ma ngali manglen Karisito.

²⁴ Biaabi gim na asen sin abala no taamat biao soina nagim titii ma muina gelulu ta taton sin gim, ngalibi xan no matenaanua Morooa di ba pupua ngali lasi.

9

Morooa a titii iwaa untataton ina tamtabiel

¹ Iaa ba xap bula atatal laa sin gim taman abala inatalil ina tinabel laa sin no untaltaalnge, biao di ta muun.

² Amuina, iaa atii nagim tataton ngali tiltsomi, ma iaa tii se paraak tsaa taman abala laa sin no Masedonia. Iaa tii asaaiti di we, sin abala miet tii se xap, gim tia lalon prowins Akaia, gim tii se

taxaaturung ngali tabiel, ma nagim tataton ngali tabiel ga atapaasi xuduxudu ina inaman ngali tabiel.

³ Oro iaa ga tulen Taitus mii lomasen turumasen ngalibi nagelulu no parparaak ngali gim ngali abala tinaxaa naba xap maarang gomsaa, oro ngali gim ba taxaaturung malen iaa ta paare weaatia.

⁴ Amuina, nawe xaa Masedonia di xaalame mii iaa ma giem ga le tatanginai gim ta xap taxaaturung, giem ba suk mangiel, sin abia giem ta taalnge sin gim, oro gim ba suk mangiel buxa tsaa sin gim.

⁵ Biaabi iaa ga adodo ngali anaai abala no taamat ta tuul, ngali detuu ba setauan uwaa gim ma araraai no tinaxaa ina tinabel mamainaang gim ta se xubatsi. Mil gim ba taxaaturungi abia tinabel mamainaang malen xa ta xap bal mamaet ngali tabiel.

⁶ Gim na adodomi, saa ia ta xap sok buxaai, naba tatei bula mu biala ta xap buxa, oro iwaa xa ta sok buxaai, naba tatei buxaai bula biala ta malisa.

⁷ Gita xuxuuk gita na tabiel taman semarang gita ta adodomi lalon xida no butsa, a xap taman bal tsaxa ma xa na xap atuaai gim ngali tabiel, amuina Morooa a titii iwaa xaa ta tatton ngali tamtabel.

⁸ Morooa a pupua ngali tabiel buxaai gim taman no amiimiilam araraa ta usli buxa sin gim, ngalibi sin no maarang araraa ma sin no leng araraa, gim ba adi sawe gim ta muun ngali, ma gim ba usli buxa ngali tabiel sin biexaal sin no tinaxaa axaau araraa.

⁹ Malen lalon xan inaatel Saam ta atalaa:
“A se tsaarien araraai xan no tinabel laa sin no muun was;

xan ina tutiik naba tino laaliu.”☆

¹⁰ Talaawaa saa ia ta tabiel taman no xalitsa laa sin unsoksok ma tsoki ngali luxaal, naba tabiel buxaai bula gim ma naba aloti xan niaan atuturung ina xalitsa ma naba aminaasi biao tatat ina nagim namaang tutiik.

¹¹ Gim ba tsap no untang sin no sal araraa ngalibi gim ba tigiri tabiel axaau sin no maarang araraa ta tsap ma sin gelulu nagim tinabel mamainaang naba atsapngen xuduxudu ina no inaman ngali putsangi axaau laa sin Moroaa.

¹² Amuina biao gim ta tiltsomi xan no inaman Moroaa lalon abia sal, biao di ta muun, di ba adi abia tiltsomi ngali xadi no muun, ma xoxot ina no inaman di ta putsangi axaau sin Moroaa naba usli buxa.

¹³ Biao gim ta xosaraa abala inatalil ina tinabel asen we, gim taxaariiti nagim xuxubu. Ma no inaman di ba pa’ii Moroaa, amuina gim paare leng we, xan inesait mamainaang Karisito aso ma talaawaa gim long amusili nagim no totore tsaa ma amuina gim exasen axaautsi mii di ma ngali no muun araraa.

¹⁴ Ma lalon xadi no sausawit ngali gim xadi no butsa naba laa sin gim amuina xan amiimiilam Moroaa ta atubudaani buxaai gim.

¹⁵ Gita putsangi axaau sin Moroaa ngali abala tinabel ta se tali sin gita. A xap xida xaa totore na pupua ngali paate alengi taman abia tinabel.

10

Pol a paare xaali xan inatalil

¹ Iaa, Pol, iaa ningi awatwati gim. Iaa paare malen Karisito ta paare sin xan namaang ina adokdoki ma mangmagus. Biexaal di putsangi iaa we iaa tehibi biala iaa ta enanngie mii gim, oro iaa xap mataa ngali paare biala iaa ta laa palpalaa.

² Iaa ningi awatwati gim we, biala iaa ta manman mii gim, iaa ba xap paare watwat bula sin gim malen iaa ta ngiti ngali epuske mii biexaa inaman di ta adodo we, gelulu manman lalon namaang ina xolkolmoxo ina inaman.

³ Gelulu tino lalon abala xolkolmoxo, oro gelulu xap sas lalon xaa maxil malen xolkolmoxo ta xosaraa.

⁴ No urur ina maxil gelulu ta sas taman, a xap no urur ina xolkolmoxo oro, di ie xoror watwat sin Morooa ngali xosor atsoti araraai no barateng watwat ina xan no matenkorot Morooa.

⁵ Gelulu xosor atsoti no engangaae daraxe ma biala no namaang ina papaare parparaak biala ta tigiri tilkaali no inaman ngalibi di ga xap atii Morooa. Ma gelu bula gelu babaais sin no inaman ngali xosaraa atutiki xadi no namaang ina adodo ina amumusili Karisito.

⁶ Ma gelulu ba taxaaturung ngali asosongi no namaang ina muunlolong, biala nagim lolong naba ta xap araraa.

⁷ Gim nanen lapalaa mu sin no maarang. Nawe xa asuk taltaalnge so we, ia xan Karisito, na adodo bula we, gelulu bula xan no Karisito malen ia mu.

⁸ Iaa ba xap mangiel nawe iaa paraak gomsaa taman abia banam Orong ta tali sin gelulu ngali axosngi axaautsi gim laa lapalaa, o a xap ngali axolngi gim.

⁹ Iaa xap saan ngali ina amataatinai gim taman nugu no inaatel.

¹⁰ Amuina biexaal di we, "Lalon xan inaatel xan no papaare a mamaxet ma atuaai, oro biao ta manman atala lalon pakpak ia nan tebibu ma xan no papaare a xa lii gomsai."

¹¹ Biao mat inaman di na nanxilalaa we, gelulu no uk taamat biao gelulu ta xap manman mii gim, biao gelulu ta atatal laa sin gim ma lalon no maarang gelulu ta xosaraa biao gelulu ta manman mii gim.

¹² Gelulu xap apuaa gelulu tsaa mii biexaa inaman, di ta paraak taman di tsaa ngali tsap nagim no lalaamua. Biao di ta apuaa di tsaa sin di xuxuuk, di xap sinaae.

¹³ Gelulu ba xap paraak buxa taman no maarang lokobel ina tinaxaa Morooa ta se tali sin gelulu. Oro gelulu ba paraak mu taman no maarang Morooa ta se tali abia banam sin gelulu ngali xosaraa, biao tinaxaa gelulu tii xosaraa a manman bula labatina gim.

¹⁴ Gelulu ba xap paraak taman abia tinaxaa ta xap nagelulu xa xolot sin. Nawe gelulu nii xap xaalame sangan gim ma atiltsoli xan matenaanua Morooa tia, biao gelulu xap pupua ngali paraak. Gelulu se xaal palpalaa malen gim taman xan inesaait mamainaang Karisito.

¹⁵ Ma gelulu xap paraak taman no tinaxaa biexaa inaman di ta xosaraa. Nagelu liliis taman

tinaalnge aweaatalaa, biaa nagim tinaalnge naba lo tsiktsik tsaa, ma nagelulu tinaxaa bula labatina gim naba tsik lot buxa.

¹⁶ Ngalibi gelulu ba pupua ngali baais taman inesaait mamainaang nan biexaa xolot talaa laa-muaan gim. Amuina gelulu palo ngali paraak taman xa tinaxaa di tii se xosaraa lalon xaka xolot xa taamat xaatsap.

¹⁷ Oro, *“Saa ia ta we na paraak, na paraak lalon Orong.”*[☆]

¹⁸ Orong a xap axilangi xa ta pinis atilngi ia tsaa, oro Orong a pinis atilngi iwaa xa tii se axilangi.

11

Pol ma no aposal ababaa

¹ Gim tii se sirawaa biexaal di tii pinis atilngi di tsaa, biaabi poroklii iaa na atolomi adokdoki iaa malen iaa tangtangabaa ma iaa ba pinis atilngi iaa tsaa, oro gim tii se xosaraa tsaa abia.

² Iaa asaaiti gim ngali xosaraa abia, amuina iaa adodo buxa ngali gim malen Moroaa bula. Iaa se xubu tali gim ngali xan no Karisito malen xa aina uul iwaa ta tomtom, di tii xubatsi ia ngali maxis sin mil.

³ Oro iaa mataa we Saatan naba apanaai gim taman xan no dalek malen tii xosaraa sin Iwa, ma nagim no adodo naba soro laa palaaen nagim mangmangle laa sin Karisito.

⁴ Amuina nawe xa a xaalame sangan gim ma tii ga baais taman xa Iesu xaatsap, ngen iwaa Iesu gelulu tii se baais taman ma nawe gim adi xa

[☆] 10:17 10:17 Jer 9:24

tanua xaatsap ngen iwaa Nantanua Pat gim ta se adi, o xa inesaait mamainaang xaatsap ngen abia gim tii se tsiili. Gim sirawaa atatoni no.

⁵ Oro iaa adodo we iaa se xosor buxaai no tinaxaa ngen abia di, di ta paare we di ie banam oro a xap.

⁶ Iaa tii xap asasing ngali tsap xa unpapaare, oro iaa ie sinaae. Gelulu se alengi axaautsi sin gim balawaa a so, sin no daan sal.

⁷ Aso, iaa tii xap xosaraa namaang tsaxa, biao iaa ta adokdoki iaa tsaa, ngalibi iaa ba manglen gim amuina gim tii xap ulii iaa, biao iaa ta babaaais taman xan inesaait mamainaang Morooa sin gim.

⁸ Iaa pula sin biexaa xan no matenaanua Morooa, sin iaa ta alalet xuxute sin di ngali tiltsomi gim.*

⁹ Ma biao iaa ta manman mii gim ma iaa ga muun ngali xawas, iaa tii xap ningi gim ngali xaa was, amuina nugu no taamat lalon Iesu di ta xaal Masedonia, di tii tabali iaa sin nugu muun. Iaa tii palo ngali ningi gim ngali xaa was sin no mat laxen sal ma iaa ba lo xoxosaraa abala namaang tsaa.

¹⁰ Balawaa no totore biao iaa ta paatinai taman Karisito aso, malen iaa tiltil lalon no matan Morooa, ma a xap xa ina abala prowins Akaia naba tilkaali nugu parparaak.

¹¹ O ngalisa? Amuina iaa ta titii buxaai gim. Morooa atii, iaa titii gim.

* **11:8 11:8** Pol atalaa malen tii pulaxi xaa xuxute sin biexaa xan no matenaanua Morooa oro aso we biexaa xakaa malen anua di taton mu ngali tabali Pol taman no xuxute.

¹² Ma iaa ba lo xoxosaraa abala namaang ngali tilbanti abia xadi adodo we di arie pupua mii gelulu lalon no maarang di ta paraak taman.

¹³ Amuina biao no mat taamat, di xap no aposal so, di saan ngali apanaai no inaman, di atolomi malen xan no aposal Karisito oro a xap.

¹⁴ A xap maarang ngali olol sin, amuina Saatan tsaa atolomi ia malen xa angelo ina laleng.

¹⁵ Biaabi gim nangaam olol, we xan no untutule Saatan di ba atolomi malen di no untutule ina namaang tutiik. Xan ininte Moroaa naba asen iliil ina xadi no namaang tsaxa.

Pol a paraak taman sosong ta saae

¹⁶ Iaa sebula paare, gim nangaam adodo we iaa malen xa tangtangabaa. Oro nawe gim paare weaatia, gim na sirawaa iaa ngali tsap xa tangtangabaa ngalibi iaa ba paraak dokdok mu.

¹⁷ Lalon abala nugu parparaak tsaa, iaa xap papaare malen biao Orong ta xaa papaare, oro malen xa tangtangabaa.

¹⁸ Amuina xuduxudu di parparaak taman di tsaa malen xolkolmoxo ta xosaraa, iaa bula iaa ba paraak.

¹⁹ Gim adodo we gim suk sinaae, oro gim suk taton ngali lolong sin no tangtangabaa.

²⁰ Aso gim siriwaa biexaal biao di ta xosaraa gim malen no untutule o ga adi nagim no xuxute ngali ia tsaa o ga apanaai gim ngali xan taton tsaa o ga aturangi ia tsaa laa lapalaa ngen gim o ga tabaii gim.

²¹ Iaa xap mangiel we gelulu tii xap xosaraa xa namaang tsaxa sin gim malen abala no aposal

biaa di ta xap no aposal so, biao di ta adodo we iaa suk malumlum buxa ngali xosaraa abia no namaang![†]

Gim na adodomi, iaa papaare malen xa tangtangabaa. Iaa pupua ngali paraak watwat taman xaa was we, xa xaatsap naba soro paraak watwat taman.

²² Di no Jiu? Iaa bula. Di no Israel? Iaa bula. Di xan no utmilmil Abaram? Iaa bula.

²³ Di xan no untutule Karisito? Iaa suk buxa. (Nugu adodo a ngaungaau ngali paare weaatala.) Iaa tii suk taxaa buxa tsaa, no daan leng, iaa tsiga nan anua lodo, di sas buxaai iaa, ma a xudu no leng iaa se atat sin minet.

²⁴ A lima no leng no Jiu di tii ririiti iaa, no sangaul a tuul ma ga laa paasaaet ina ririit.

²⁵ A tuul no leng no Rom di ririiti iaa taman no paas, ma no inaman di pidi iaa taman no xaat, ma a tuul no leng no mono tii lulus taman iaa, iaa ga be nan laman sin bing axuuk ma leng axuuk.

²⁶ Biao iaa tii laa sin nugu no ines xuduxudu, iaa tii suk atataen minet sin nugu no ines lalon no daan sal ma sin no unpulapula, ma iaa tii atataen minet bula sin nugu no inaman tsaa, ma sin no Gentail ma lalon no inaman laba ma iaa tii atataen minet bula papan laman ma sin abia di, di ta atolomi ngali tsap no taamat, oro di xap no taamat so.

²⁷ Iaa tii tigiri taxaa watwat, ma iaa ga tii xap xaa urange; iaa tii se atii xariin itol ma marua ma

[†] **11:21 11:21** Pol tii reret, amuina amat malen no Korin, di saan ngali xadi no unaasasing di na xosor atsaxati di. Pol ga paare, "Iaa xap saan ngali asosongi gim."

biexaa leng iaa man gomsaa ta xap xaa luxaal ma iaa ga maxadil ma belbel.

²⁸ Ma labatina abala no daan maarang, iaa tigiri saeen no xaraxin lolbiir ngali xan no mate-naanua Morooa, sin no leng xuxuuk.

²⁹ Nawe xa a malumlum o iaa saeen malumlum bula. Nawe xa taamat a laamtali xa laa sin namaang tsaxa, iaa ba suk magaa.

³⁰ Nawe iaa ba paraak, iaa ba paraak taman no maarang ta asen nugu tebibu.

³¹ Xan Morooa ma Mom Orong Iesu, iwaa gita na pa'ii laaliu, atii we iaa xap abaa.

³² Tia Damaaskas iwaa gawana paina King Aretas a asaaiti no unxoxo nan inaman laba ngali tsiili iaa.

³³ Oro no taamat di pitsi sua disdis sin sobil lot ma di ga aririi iaa laa lapula lalon maalwimat ina xuur ma iaa ga sol loxono gawana.

12

Pol a lasi binalang ina nantanua ma xan xoxon

¹ Iaa ba lo parparaak laa tsaa, oro a xap atsapngen xawas mamainaang. Iaa ba asaait leng taman no binalang nanen ma no luluba biao Orong tii alengi.

² Iaa atii iexa taamat lalon Karisito iwaa sin sangaul axuuk ma ga laa et no miet ta se xap, Morooa tii giwaa laa lapalaa lalon nanaatuul ina balalangit. Iaa xap atii nawe tii tsiga mii xan pakpak o a xap, Morooa mu atii.

³ Ma iaa atii ilawaa uk taamat, nawe tii laa taman pakpak o taman nantanuan mu, iaa xap atii, oro Morooa atii,

⁴ Morooa tii giwaa laa lapalaa nan biaa xobel matmirmir. A longmien no maarang biaa ta xap pupua ngali paare taman.

⁵ Iaa ba paraak taman aia mat laxen taamat, oro iaa ba xap paraak taman iaa tsaa, oro taman nugu no malumlum mu.

⁶ Oro nawe iaa inten ngali paraak, iaa ba xap malen xa ta tangtangabaa, amuina iaa papaare taman soina. Oro iaa palo ngali xosaraa abala, amuina iaa saan ngali no inaman, di na adodo ngali iaa mu ngali sawe iaa tii se xosaraa ma paare taman.

⁷ Ngali tilbanti iaa ngali xap tsap unparparaak amuina ngali alengi no xaraxin luluba, Morooa a sirawaa iaa ngali saaen sosong taman xoxon lalon nugu pakpak, tii malen xa ngutsu xaal sin Saatan, ta asosongi iaa buxa.

⁸ Iaa tii xosaraa no ningning a tuul laa sin Orong ngali na saali abala xoxon sin iaa.

⁹ Oro tii ga paare ngali iaa, "Nugu amiimiilam a pupua ngali iu, amuina nugu xoror naba tsap lot nawe iu malumlum." Biaabi iaa ba paraak taman taton ngali nugu no malumlum, ngalibi xan xoror Karisito naba manman papan iaa.

¹⁰ Biaabi ngali xan axaau iesan Karisito, iaa suk taton sin nugu malumlum, ma biaa di tii ie atsoti iaa, lalon nugu no mamaet, ma biaa di tii nen amagurusiki iaa ma lalon no xariin lolbiir. Amuina biaa iaa ta malumlum, iaa watwat.

Xan adodo Pol ngali no Korin

¹¹ Iaa se xosaraa iaa tsaa malen xa tangtangabaa oro gim xosaraa iaa ngali weaatia.

Naba suk tutiik nawe gim nii manglen iaa, amuina biexaa xaraxin aposal di xap axaau buxa ngen iaa, iaa ta maarang gomsaa.

¹² Biaa iaa ta manman mii gim, iaa tilwatwat lalon no mamaet ma iaa ga suk asen so we iaa aposal, amuina iaa xosaraa no daan axixila ma no axixila xoror labatina gim.

¹³ Maarang ta xuuk iaa tii xosaraa sin biexaa xan no matenaanua Moroaa biaa iaa tii sirawaa xadi no xuxute ngali tiltsomi nugu no muun. Iaa tii xap xosaraa sin gim. Balawaa a xosaraa gim ngali saaen we gim no maarang gomsaa? A malen gim adodo we, iaa na atsuraa gim ngali adodolii nugu no namaang?

¹⁴ Talaawaa nugu nanaatuul ina uwaa gim, ma iaa se taxaaturung ngali ma iaa ba xap tsap xa mamaet sin gim, amuina iaa xap saan ngali nagim no mat maarang oro iaa saan ngali gim. Amuina no tsi di xap xaa taxaaturungi xaa maarang ngali xadi no mom ma nagaa, oro no mom ma nagaa di xaa taxaaturung ngali xadi no tsi.

¹⁵ Biaabi iaa ba suk taton ngali tali nugu no maarang araraa ngali gim ma nugu tino bula. Nawe iaa titii buxaai gim, asen parawe, gim ba titii adokdoki mu iaa?

¹⁶ Gita na ukbal we, iaa tii xap tsap malen xa mamaet sin gim. Oro biexaal di tii paare we iaa sinaae buxa ma iaa ga apanaai gim araraa.

¹⁷ Aso iaa tii xap apanaai gim biaa iaa tii tulen no ngutsu laa sin gim, ngaa?

¹⁸ Iaa tii atsuraa Taitus ngali laa sangan gim ma iaa tii ga tulen xida taamat mii ia. Taitus tii xap

apanaai gim ma tii ga pulaxi nagim no maarang. Gelu tii amusili abia uk namaang laa sin gim.

¹⁹ Male gim tii se adodo buxa tsaa we, getu tii tilkaali getatuul tsaa sin gim? Nage tu no xos ina taamat, getu tii paare lalon no matan Morooa malen abia di lalon Karisito, ma sin no maarang araraa getu tii xosaraa ngali awatwati gim.

²⁰ Iaa mataa we, biao iaa ba ta xaalame iaa ba se xap tatangina i gim malen iaa tii saan ngali, ma gim ba xap tatangina i iaa malen gim tii saan ngali. Iaa mataa we xaa inemaga ae bia, no adodo tsaxa, tinaxaa ina bal musteng, tse xirixi, xap mangmangle xa, pingpingse xa, madil laba; ma no matanaanua di tamtsaare.

²¹ Iaa mataa we, biao iaa ba ta sebula mula xaalame, nugu Morooa naba amangieli iaa laa-muaan gim, amuina gim xap long amusili iaa ma iaa ga lolbiir sin abia di, di tii xosaraa namaang tsaxa setauan ma di ga xap puxisbal sin xadi no namaang tsaxa ina exus, tino ina mataxaaxaa, biao tii se taxaa lalon di.

13

No xapkap ina inanaa

¹ Balawaa naba nanaatuul ina nugu limlim laa sangan gim. Xan inaatel Pat Morooa, a paare weaatalaa, "Sin ininte ina no namaang tsaxa araraa alua o a tuul ina no tiltsoxoti di na paare taman abia uk maarang ngali asen we, asuk so, tii tsap."☆

² Iaa tii se atewaai tsaa gim, biao iaa tii manman mii gim, sin nanaalua ina nugu uwa.

Talaawaa, iaa ba sebula paare taman, biala iaa ta xap manman mii gim. Sin nugu mulamula iaa ba xap poroklii xaal di na sol loxono sosong,

³ amuina gim saan ngali iaa na asen we, Karisito a papaare lalon iaa. A xap malumlum ngali taxaa mii gim oro xan xoror watwat a suk buxa labatina gim.

⁴ Ngali atik axaautsi, tii taxiupapan tongol, lalon malumlum, oro tii tino lalon xan xoror Morooa. Malen mu, Gelulu* ta malumlum lalon ia oro sin xan xoror Morooa gelu ba tino mii ia ngali taxaa laa sin gim.

⁵ Gim na nen axaautsi gim tsaa nawe nagim tinaalnge aso o a xap. Asuk so we gim atii we Iesu Karisito ia lalon gim oro nawe a xap, nagim tinaalnge a xap so.

Asuk so we, gim atii we Iesu Karisito ia lalon gim. Male gim xonon gim tsaa ma gim na nanxilalaa we, gim xap xan no tsi Morooa.

⁶ Ma iaa taalnge we, gim ba tatanginai malen, gelu xap xol sin abala xonkonon.

⁷ Talaawaa gelulu ningning laa sin Morooa ngali gim na xap xosaraa xaa was na tsaxa. A xap ngali no inaman di ba lasi we, gelulu xan no untinaxaa Morooa. Oro ngali gim ba xosaraa sen maarang ta tutiik, malen nawe biexaal di soro adodo we nagelulu tinaxaa a se xol.

⁸ Amuina gelulu xap pupua ngali xosaraa xawas ngali epuske mii soina, oro ngali til mu taman soina.

* 13:4 13:4 Pol ma Timoti.

⁹ Gelu suk taton, biala gelulu ta malumlum oro gim watwat; ma nagelulu no sausawit ngali nagim mamainaang.

¹⁰ Sin abala muina, iala ga atalaa abala no maarang biala iala ta xap manman ma biala iala ba ta tsap, iala ba xap tali mamaet sin gim taman banam. Orong a tali abala banam sin iala, ngali axos laangen gim lapalaa ma a xap ngali tsaalen gim laa lapula.

Xapkap ina no totore

¹¹ Nugu no taamat, balawaa nugu xapkap ina totore, xubalaasaai sin gim. Gim na man taman adodo ta uk ma gim na tino lalon malina. Gim na papaalii Morooa na atsiki gim laa ngali maatkel lalon tinaalnge ma gim na lolong sin nugu inanaa. Gim na ukbal ma gim na manman lalon malina. Ma xan titii ma malina Morooa naba manman mii gim.

¹² Gim na suei atatoni gim xuxuuk taman abia engur ta pat. No untaltaalnge araraa di tulen xadi pinpinis ma tataton laa sin gim.

¹³ Iala ningning ngali xan amiimiilam Orong Iesu Karisito, ma ngali Morooa naba titii buxaai gim araraa, ma Nantanua Pat naba pupua ngali xosaraa gim araraa ngali xale etudim taman ukbal mii ia.

Inesaait Mamainaang Laa Sin Notsi
The New Testament in the Notsi language of New
Ireland Province, Papua New Guinea

Copyright © 2024 Wycliffe Bible Translators, Inc.

Language: (Notsi)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-08-14

PDF generated using Haiola and XeLaTeX on 14 Aug 2025 from source files dated 14 Aug 2025

601480e7-130d-5189-be42-9e43a92dbdde